

Dieu tout est deu aux traux de nos Pe-  
res , dont Nostre Seigneur a voulu que  
i'aye esté témoin , voyant la ferueur de  
leur zele , leur courage indomptable , leur  
patience à tout souffrir , leur actiuité à tout  
faire , leur humilité dans vne vie vraye-  
ment cachée en vn monde inconnu ; per-  
sonnes qui d'ailleurs ne manquent pas  
pour la pluspart de qualitez qui les eussent  
rendus recommandables en France.  
Quand ie les voy embrasser la Croix  
auec plaisir , les souffrances auec ioye , &  
les mépris auec amour , qu'ils portent cha-  
que iour leur ame entre leurs mains , estans  
continuellement exposez à mille dangers  
de la mort ; & que peut-estre la pluspart  
sont pour mourir au milieu des feux & des  
flammes d'vn ennemy cruel , qui va de  
iour en iour rauageant ces Pais : quand ie  
voy que ces dangers les animent plustost  
que d'affoiblir le moins du monde leur  
courage , il me vient souuent en penséo  
que Dieu vouloit qu'vne vertu si forte,  
si constante & si vigoureuse , 'suppleast au  
defaut des miracles , dont il semble que  
sa diuine Prouidence ne veuille pas se fer-  
uir en ces siecles derniers , pour aduancer  
la conuersion de ces terres infidelles.